

四庫全書

史部

欽定四庫全書

史部

宋史全文卷三十四

詳校官編修臣潘廷筠

編修臣裴謙覆勘

總校官降調編修臣倉聖脉

校對官助教臣卜維吉

謄錄監生臣張同履

欽定四庫全書

宋史全文卷三十四

宋理宗四

乙巳淳祐五年正月丁酉朔御大慶殿羣臣朝賀詔國
家以仁立國其待士大夫尤過於厚臺諫乃因得言而
釋私憾撫細微而遺巨奸遷謫降黜或出非辜其令三
省將見在謫籍人斟酌放令自便追奪停罷亦與酌情
牽復其貪酷害民公議弗容者不拘此旨上更新庶政

恐人才淹屈故有是詔 又詔邊將興師河南之境鋒
鏑所接寧免瘡痍中原遺民皆祖宗赤子朕甚痛之自
今邊臣各謹守封疆毋先事首戎益務綏懷大布恩信
以副朕愛養南北之意 己酉雷 庚戌御筆方春半月

雷發非時朕心祇懼當避殿減膳仍詔中外臣庶指陳
闕失 乙卯劉伯正罷以監察御史孫起予言其隱默
充位也詔以權禮部尚書兼給事中李性傳為端明殿
學士僉書樞密院事兼參知政事同提舉編修勅令及

經武要略 辛酉趙與權加資政殿大學士 二月戊

辰詔昨罷科糴但令依時收買毋得抑勒用革吏奸使民
樂輸此後仰常切遵守永毋科糴違者以違制論 甲

戊呂文德進三秩羊洪進二秩旌其五河捍禦功也

壬辰太白晝見經天 三月庚子以殿中侍御史鄭案

上進故事施行溫大雅等罪仍降詔申警中外詔曰時方
多事念未能蠲租減賦而使之不良乃肆貪虐或有前
期預借或抑配重催或斛面取贏或厚價抑納股毒吾

民朕深憫焉可令監司常切覺察務蘓疾苦而銷愁歎
倘隱而不問公論所指必罰無赦 甲辰右曹郎中吳
子良進對言鹽楮事上曰鹽楮是今日急務子良云舊
相行官販商賈坐廢近日罷官販還客販然尚恐貼納
太多商賈未便願與大臣熟議之 出十七界楮幣百
萬下淮東犒水陸戰守諸軍 壬子禁淫祀 癸丑殿
中侍御史鄭寀乞括淳祐初所剋糴本鹽可以資糴又
省造楮從之 丁巳刑部侍郎趙以夫見言國本事上

曰此事實不可緩以夫云臣編類仁宗高宗兩朝定儲
本末具載諸臣諫疏及舉行次第庶幾成憲昭然可以
早定大計 己未駕部郎官江萬里對言端平更新因
及元祐更役法事上曰只因太驟了萬里云君子只知
有是非不知有利害上曰元祐君子亦自相攻萬里云
此小人所以得乘間而入今收召未多恐元氣不壯無
以勝邪氣全在陛下把捉耳前者端平把捉不定改更
不過如紹聖第二番把捉不定更無復新之日矣上首

肯萬里又言二相退遜太過中外皆無精采上復肯之
辛酉詔陳畏葉武子年高德粹靜退可嘉其以畏為
集英殿修撰武子秘閣修撰以劉伯正為資政殿學士
提舉臨安府洞霄宮癸亥御後殿引見吏部奏舉改
官二十一人權吏部侍郎王伯大奏事言及嵩之獨
相時鄭起潛濮斗南專失人心上曰數人做盡刻薄事
伯大又言國本上曰朕置小學正是為此伯大乞早定
大計以慰天下之心四月己卯詔以今年九月有事

於明堂 癸未以呂文德為樞密副都承旨依舊淮西

招撫使知濠州 甲申鎮星犯太微垣上相星 丙戌

詔劉虎蕭均趙邦求夏臯各進一秩賞清河漣泗招信

捍禦之勞也詔呂文德依舊節制濠豐壽宿遷等郡軍

馬詔以杜範為觀文殿學士光祿大夫致仕 丁亥以

杜範薨輟視朝二日尋贈少傅 戊子詔李曾伯余玠

董槐孟珙王鑑職事修舉加曾伯天章閣直學士槐進秩

珙鑑進二秩並因其任 五月丁未趙葵言諸沙江防

極為踈陋乞下沿江制司及副司湖南江西帥司湖廣

總所兩浙漕司許浦水軍司共造輕捷戰船

闕

朔

遊擊軍強壯三萬人分布新船以備緩急從之 詔太

常少卿王萬立朝審諤古之遺直為郡廉平古之遺清家

貧母老朕甚念之特贈集安殿修撰仍撥賜官田五百

畝封樁庫十八界楮幣五千貫以贍其家 丁巳詔知

鎮江府許堪職事修舉進一秩 庚申詔特賜杜範謚

曰清獻 六月丙寅以闕雨詔決中外繫囚杖以下釋

之命臨安府守臣禱雨於天竺霍山 甲申左司諫謝

方叔乞早定國本仍錄仁宗朝司馬光范鎮建議始末
以進上嘉納之 以兵部侍郎徐元杰暴卒置獄丙戌

徐元杰特增四官 七月癸巳朔日有食之 甲午御

筆屬茲閔雨之時乃遇日食之異天變示儆惕然靡寧

朕當避殿減膳以荅譴告凡爾近臣更宜竭忠以輔不

逮 辛丑以湯中言常潤大旱恐流民不安令監司郡

守措置儲畜明示振卹之意沿江諸郡亦如之命有司

舉行寬卹十事 甲辰以禱雨奏告天地宗廟社稷宮

觀 乙巳出封樁庫十八界楮幣二十萬賑臨安細民

給散三衙諸軍亦如之 戊申命從臣日一人禱雨於

天竺山 己酉詔劉伯玉金淵落職罷祠行監察御史

劉應起之言也 庚戌進鄭清之為少傅 乙卯詔徐

元杰鳴陽之鳳劉漢弼觸邪之豸天不慙遺奪我忠臣

漢弼母老元杰子弱一貧皆同朕甚憫之可各賜官田

五百畝新楮五千緡以見懷賢不已之意

龜鑑曰或撥田楮以旌遺直或賜田畝以厲忠臣或賜筆札以諭臺諫其導人使諫有如此者或康色以伸直言或賜爵以旌序對或增秩以表封章其忘勢樂善有如此者謂非得舜禹達聰聽諫之盛心而何

八月戊辰以河南諸郡秦琳等八人連年在邊戰守

宣勞各進一秩添差淮東西兵職有差 詔求通天文

歷筭之人 壬申以范鍾為明堂大禮使游侶禮儀使

趙葵儀仗使李性傳鹵簿使趙與權橋道頓遞使 丙

申詔申嚴預借重催取贏抑配之禁令監司覺察毋害

吾民 九月癸巳朔詔濮斗南更降兩官文虎葉貴各

降一官項容孫落職罷祠以右正言鄭杲言其附麗權相也 己酉朝獻景靈宮 庚戌朝獻太廟 辛亥大

饗於明堂奉太祖太宗寧宗並大赦天下 十月壬午

主管官告院莊同孫對進洪範五事箴上曰五事當於敬字上用工夫讀至思箴上曰五事以思為本 十一

月乙未鄭清之乞歸田詔不許 丙申以皇叔祖太保

崇寧軍節度使判大宗正事嗣秀王師彌職事修舉進

一秩 壬寅詔更奪林光謙三秩徙居衡州奪袁立懦

宣壁王至一秩劉械施逢辰劉鮒兩秩以監察御史江
萬里言其貪賊及依憑權門也 甲辰范鍾請老詔不許

以禮部尚書陳韡為端明殿學士同簽書樞密院事
尋差同提舉編修經武要略 十二月壬戌朔以祈雪

詔大理寺三衙臨安府兩浙州軍并建康府係囚杖以
下釋之 丙寅詔昨據太史奏來歲元旦日有食之方歲
序之更端值太陽之交蝕凜然譴告震於朕心嘗觀祖
宗盛時或有此異上下之間益相儆懼今宜講求實政

凡可以銷弭災異者次第行之毋為具文以稱朕祇畏
天戒之意 戊寅詔太史奏來歲正旦太陽當蝕天示
儆戒不同他時朕心惕焉益思恐懼修省自今月二十
一日避正殿減常膳求直言朝廷百司講求闕政寬民
力卹軍旅緩刑獄問疾苦輯流民凡可以銷菑變者毋
匿厥指共圖應天之實元旦百官免稱賀 同日又詔
兵財係乎國命強兵之事爾葵主之裕財之計爾難理
之二相則總大綱而中持其衡以共濟國事從監察御

史江萬里之言也 已邠以游似為右丞相兼樞密使
李性傳同知樞密院事鄭清之為少師奉國軍節度使
依前醴泉觀使兼侍讀仍奉朝請賜下帶許服繫賜第
行在資政殿大學士提舉萬壽觀兼侍讀與權換授皇
兄安德軍節度使開府儀同三司萬壽觀仍奉朝請皇
弟保康軍節度使嗣榮王貴謙武康軍節度使嗣榮王
與芮並加少保 癸未詔李性傳除職予郡

丙午淳祐六年正月辛卯朔日有食之上不視朝詔天基節紫

宸殿上壽集英殿大宴並免 辛卯朔以陳韓言置國
用所仍命趙與懽為提領官 辛丑宰執以日食乞解
機政詔不許 甲辰以羣臣上表請御正殿復常膳從
之 辛亥范鍾再乞解機政不許 二月辛酉朔詔禮
部貢舉 壬戌金部郎官王佖對言人主論相當取其
格心不可取其阿意上然之 戊辰范鍾再乞歸田詔
進三秩除觀文殿大學士醴泉觀使 辛未范鍾提舉
洞霄宮任便居住從所乞也 壬申雪蠲大理寺三衙

臨安府并屬縣點檢贍軍酒庫所贓賞錢以雪寒出封
樁庫十八界楮幣十萬給三衙諸軍 乙酉宗正少卿
張礪對言治兵理財當為一事上誦范鎮財已竭而密
院調兵無窮之語曰兵財豈可分為兩事 礪又奏先
朝蘓頌傅堯俞皆不受宣諭事上悚聽然之曰詔三衙諸
軍月支銀並倍給 四月辛酉太白晝見 壬戌月犯
太白 戊寅殿中侍御史謝方叔左司丞湯中乞旌異
朱熹門人胡安定呂燾蔡模以勸後學並詔補迪功郎

添差本州教授仍令所屬給札錄其著述并訪以所欲
言 甲申詔曰朕臨朝願治每念乏才有意作成既親
書扁題分賜諸學并賜諸生束帛以示激勵其令三學
官於前廊長諭及齋生中公舉經明行修氣節之士別
議旌賞京學如之 閏四月乙未以資政殿大學士徐
榮叟薨輟視朝一日 己酉秘書丞王璞進對言杜衍
封還內降事上曰朕嘗說與大臣聽其執奏矣 庚戌
刑部侍郎兼中書門下省檢正諸房公事魏峻對言人

主震服天下曰斷而已上曰謀之欲同斷之欲獨若以
大公至正行之則斷在其中矣 五月庚申詔賈似道
任責措置淮西山寨城築 丙寅吏部員外郎李昉英
對言內小學事上曰朕於小學之教甚留心昉英又言
漢末宦官之禍上曰固當防微杜漸 庚午詔學校明倫
之地諸生講明不負教育朕用嘉之爰命有司舉其高
第而合詞控免陳義凜然朕重違其本心姑徇所請以
成其美所有束帛不必控辭察已卹臣 言趙葵昨陳

招兵造船買馬事悉已施行乞嚴飭閫臣激勸將士盡東南之長用長江之險從之 甲申詔權知高郵軍兼

淮西提刑蕭逢辰進一秩旌其買馬修城留意戰守也

詔決係囚 六月戊子朔詔從事郎傅實之迪功郎

林公遇並特改京秩仍給札詢所欲言以都省言其杜

門樂道搢紳高之也 壬辰詔以秋闈在近文弊未革

令監學及諸路郡學精加考校崇實黜浮以俟薦送

戊戌著作佐郎兼權禮部郎官高斯得對言奸邪有復

出之憂上曰必無此事斯得又言學校以小過觸霆威
上曰此本是小事但不當率衆出見宰執斯得云學校
固不為無過但恐奸人因此動搖局面關係却不細上然
之 丙午以禱雨詔中外決係因杖以下釋之臣僚言
旱勢可慮乞分命臣僚徧禱羣望仍令有司疎決淹獄
及下諸路勸諭富家接濟細民以弭盜賊從之 詔以
淮東西制置司申五河淮安射陽湖立功將士劉全路
旻等補轉給犒有差 壬子以陳韓參知政事兼同知

樞密院事

八月庚寅起居郎兼權中書舍人暫兼權

侍郎趙汝騰奏事言北司專橫上曰近日已頗戢之矣
汝騰又言不當調護言官上曰近日少有調護者 辛
酉月犯房 己酉以太府少卿劉克莊文名久著史學
尤精可特賜同進士出身為祕書少卿尋兼國史院編
修官實錄院檢討官 辛亥校書郎兼樞密院編修官
兼諸王宮教授蔡抗奏對言正心事上曰紀綱萬化實
出於心抗又言內降斜封之弊上曰近日此等事却少

若有違碍已許大臣執奏矣抗又言宗社大計上曰今
內置小學正是此意祖宗朝亦是晚年方定抗言祖宗
時定名號雖在晚年而定計乃在一二十年之前此事
最怕因循上然之 九月丙辰朔祕書省正字林希逸
對乞信任給諫上曰朕於臺諫給舍之言無有不行希
逸又乞早決大計以慰人望上開納之 丁巳檢校少
保寧武軍節度使京湖安撫制置大使夔路策應大使
兼江陵府孟珙薨賜檢校少師 戊辰以賈似道為京

湖制置使兼知江陵府兼夔路策應使仍暫兼權沿江
制置副使湖廣總領尋兼京湖屯田使 庚寅詔以皇

弟少保武康軍節度使充萬壽觀使嗣榮王與芮子孟
啓為貴州刺史令入內學又詔內小學宗子孟奎孟蘇
為右千牛衛大將軍尋令並赴朝參 壬子榮王府講

學乞改講禮記景獻太子府乞改講毛詩並從之 十

二月庚申日南至御大慶殿羣臣朝賀詔昨令三學各
舉經明行修氣節之士而諸生合辭控免陳義甚高其

令在籍諸生並赴來年省試一次臨安府學長諭亦如
之以稱搜羅之意 丁丑以雪寒出封樁庫楮幣賑臨
安細民 辛巳以前四川制置陳隆之殉國忘家抗敵
死難可特贈徽猷閣待制於合得延賞外更官其二子
癸未以左武大夫福州觀察使知漣水軍蕭均久戍
邊城忠亦可嘉進二秩 十二月癸巳詔侍從臺諫各
舉堪閫寄及餉事者述其才器勞績以聞 乙未詔史
嵩之依所乞守本官職致仕 丙申諸司糧料院章鑑

對言納諫事上曰朕於臣僚論未嘗不見之施行鑑又
言儲才上曰人才須是養之於平時臨事方得其用
癸丑御筆昨以史嵩之用舍未決紛紛兩年比既施行
朕意已白士大夫可一志慮以就事功矣二三大臣其
為朕就實以用人材而以振紀綱飭邊備通財用為急
中外有位之士亦務就實以舉職業而以體國事克已
私遂民生為本是任賢望治之意若坐虛歲月浮於事
則朕將誰用可於元日降詔戒諭

丁未淳祐七年正月乙卯朔御大慶殿受朝賀以將祈
穀上帝預行天基節上壽禮 詔皇姪孟啓特授宜州
觀察使建資善堂於內小學置直講贊讀二員以年稚
權就王邸習訓 詔曰朕宵旰求治有年于茲若涉淵
冰未知攸濟間者任用非人不能秉禮懷義以輔朕顧
乃陷於匪彝敗俗傷教朋淫肆欺羣議全涌由朕不德
朕甚愧焉天誘之衷豁然大悟亦既絀去其黨類取其
尤者屏之遐方收召衆正是崇是信而史嵩之已俾致

其事以示朕決不復用之意其於正邪忠佞之分豈不
明白搢紳士大夫交奏迭諫惻惻款款以陳於前忠愛
備至抑朕聞正脉充本根固則外邪客氣始不能入於
今之時思所以為自強之計百爾執事亦宜相戒以實
克去已私以自公體國存心謹乃身率乃職裕乃民用
輯寧我邦家今以月正元日誕告于在位尚祇若明訓
丁卯詔戒勅州軍縣鎮不許因誕節賜宴多殺物命
一遵景祐三年詔書仍刻石所在放生池 戊寅詔准

浙發運司給米二萬石濟建寧邵武諸郡被水之民

以兵部尚書兼侍讀吳潛知貢舉權兵部侍郎兼直學
士院應繇起居舍人兼國子司業黃自然同知殿中侍
御史周坦監試 二月乙酉朔御筆付吳潛以下崇雅

黜浮俾得士用 庚寅都省言淮安縣主簿周子容遭

逆全之變陷北十有六年數以外謀密聞邊閫拔身來

歸志行可尚詔特改朝奉郎與陞擢差遣 壬辰詔十

七十八界會子更不立限永遠行用 丙申詔四川沿

邊州縣官任滿日轉循官資有差從制臣請也 己亥

以貴妃賈氏薨輟視朝二日 乙巳詔翰林學士李韶

屢疏請老特授端明殿學士提舉隆興府玉隆萬壽宮

丁未詔令封樁下庫支十七界會子十二萬貫付淮

西安撫司造舩船 壬子詔出封樁庫十八界會子

五萬貫付臨安府津遣三邊請學士人歸里以所乞省

試難從故有是命 二月甲子知大宗正丞兼權金部

郎官姚希得進對奏李韶老成有德望宜留奉內祠侍

經幄 戊辰詔李韶依舊端明殿學士提舉萬壽觀兼

侍讀 庚午命從臣一人禱雨于天竺山 四月庚寅

詔昨以理財分任正欲責成歲一二易官未見成效檢
正都司專務經理詎宜付之悠悠可諭朕意使協力自
公共濟國事 辛卯詔雨澤愆期決中外係囚杖以下

釋之詔潭州縣令魏夢極棄邑避寇司戶參軍吳焱違
帥臣指授致攸縣令黃端卿輕舉而死各鑄兩資 丁

酉廣西經略司劾知廣州張公明貪暴不法詔削官三

等南安軍居住 庚子以刑部尚書王伯大為端明殿

學士僉書樞密院事翰林學士知制誥吳潛端明殿學

士同僉書樞密院事 四月辛丑以鄭清之為太傅右

丞相兼樞密使越國公游侶罷相為觀文殿大學士醴

泉觀使兼侍讀趙葵樞密使兼參知政事督視江淮京

西湖北軍馬陳韓知樞密院事湖南安撫大使 庚戌

以禱雨未應詔錄中外係囚並減一等杖以下釋之蠲

大理寺三衙臨安府屬縣見監贓賞錢 壬子廣西漕

臣劾貴州守臣陳鑑迫脅考試官私取士人壞科舉法
詔再鐫一秩勒致仕 五月甲寅詔武功郎揚州寧淮
軍統制張忠戍守浮山手搏寇兵俱死于水特贈武略
大夫更官其一子 乙卯以禱雨未應詔諸路提刑司
及州縣見拘罪囚非情理巨蠹者並釋之 丙辰詔參
部人因礙小節久淹逆旅者令吏兵部權與注授 己
未禱雨于天地宗廟社稷 戊辰以遂寧府觀察支使
趙希湄監試鬻舉詔削一資 己巳詔賜兩淮京蜀曾

經兵入之地田稅三年其宿逋悉除之 壬申吳潛兼
權參知政事 乙亥以權吏部侍郎兼中書舍人趙汝
騰充殿試詳定官權工部侍郎兼直學士院尤燂左司
郎中尹煥同詳定 丙子御集英殿策進士 六月癸
巳御集英殿賜正奏名進士張淵微等及第出身凡五
百二十七人 乙未賜特奏名進士勅凡七百五十人
丙申詔曰朕德弗類無以自媚于上下神祇災變薦
臻以戒不治迺者冬無霜雪土膏弗滋穡事方興雨不

時若背春涉夏漸成曠乾農疇蓋有以種不入土聞者
其將何以格歲穰續民食並走羣望敬恭明神非不吁
嗟有求嘉應罔答至於庚伏旱勢益張切迹災異之來
端不虛發朕不勝憂懼其避正殿減常膳側身修省匪
曰具文二三大臣盍相與盡忠竭力圖所以銷變救災
之寔朕躬有過及時政闕失應中外文武臣僚暨於士
民皆得悉意指陳毋有所諱布告天下咸體朕懷 甲
辰出豐儲倉米三十萬石以平糴價 己酉詔旱勢日

甚怛於朕懷變不虛生厥有攸致兩淮襄蜀嘗經賊入
江閩內郡間因寇作遺骸暴露感傷和氣令所屬州縣
収瘞之 詔京湖北路副總管王英赤心歸順進官二
等 七月甲寅進士及第張淵微等言天久不雨乞免
瓊林錫宴禮上從之 丙辰詔荆鄂都統司聽京湖制
帥司節制池州建康府鎮江都統司並聽沿江制司節
制許浦都統司仍聽平江府并浙西都大提舉兵船司
節制江州都統司改聽興國蘄黃安慶四郡節制從督

視趙葵之請 己未月入心 庚申安慶守臣歐陽頤
以改差輒之任詔削官二等令憲臣謝獻子領郡事

壬戌御射殿閱正奏名進士射 詔辭免除授實為繁

文除侍從臺諫給舍兩省左右史以上許辭免餘官不

許 癸亥閱特奏名進士射 乙丑吳潛罷以端明殿

學士知福州 丁卯以別之傑為參知政事諫議大夫鄭

宋為端明殿學士同簽書樞密院事 癸酉詔賞浙東

西福建路監司州郡所申官士之家濟糴者凡九人補

轉官資有差 八月甲申鄭寀罷 丙戌詔令戶部嚴

革諸路州縣增收多量苗米之弊 辛卯詔石鈞陳大

任王方烈各鐫一秩以誣平民為重辟謝思義張懋各

進一秩旌其平反之功從湖北憲臣之請 己亥以秋

風已勁邊備當嚴浙右四郡密通行都魏村福山柴墟

一帶宜預為之備詔守臣條具措置 辛丑詔前通判

彭州宇文景訥罵賊而死特贈官二等仍與一子下州

文學 壬寅詔監司守臣宜亟講荒政以賑乏絕稅租

有合蠲減者具實以聞 甲辰以高定子薨輟視朝一日贈少保 九月丙辰詔命官該赦陳乞改正不拘期限今後赦條刪去限一年內四字從左司程元鳳之請也 丁巳詔改尚書省提領鹽事所為提領茶鹽所

甲戌太傅右丞相越國公鄭清之奏將回授太保一秩追贈四世祖詔從之 十月辛巳太白晝見 詔荆

湖副都統李得討桂東峒寇有功進官一等 癸未朝獻景靈宮以嚴州旱詔豐儲倉給米萬石賑糶 丙戌

京湖安撫司調兵平辰沅蠻徭有功總轄張謙統制高天祐等賞賜有差 己酉臣僚言格法日壞天下視聽益不美因條陳添差攝局須入奏辟改任薦舉借補曠職匿過十弊乞風示中外從之 甲寅以鎮江府旱詔兩浙轉運司檢覈蠲租七萬四千石有奇 十二月壬午以趙與權為端明殿學士提領戶部財用 庚寅以近畿旱詔正歲天基節大宴權免其州郡錫宴務從省約毋得科擾以副朕敬天愛民之意 辛卯以李鳴復薨

輟視朝一日 壬辰詔程九方陷北十一年脫身來歸
條陳邊地事宜有益備禦特補迪功郎

戊申淳祐八年正月甲戌嗣榮王與芮奏男孟啓蒙恩
建資善堂以私家未便乞寬開講之期從之 丙子太

常寺言檢照中興禮書四孟朝獻景靈宮分三日行禮
自淳熙十五年後分作兩日近年諸後殿多命宰執分
詣如遇車駕次日親臨每位三上香一跪奠俯伏興再
拜得禮之宜詔依 丁丑侍御史周坦言春秋釋奠於

先聖禮典至重比年樂奏未終徹俎紛紛大不肅目今
乞令監祭官糾察以聞從之 二月戊子月生黃白暈

癸巳雷 乙未雷 辛丑荆湖帥臣陳韓奏國家以

火德王於火德之祀合加欽崇炎帝陵在衡州茶陵縣
廟久弗治乞相度興修以稱崇奉之意從之 丙午周

坦奏乞申明十七十八界會子並永行用以堅民信左
司趙汝堅請更造十九界太博黃洪請不用會子停賣
鹽鈔狂言惑衆乞正妄誕之罪詔各免所居官 丁未

監察御史陳垓奏乞宣諭輔臣申飭吏部未歷郡者不
許為郎已為郎者更迭補外未歷縣者必令須入已作
縣者須及任滿闕次必依先後毋或改差庶幾抑僥倖
以重名器從之 二月甲寅督視趙葵上將士泗州解
圍之功詔奇功特與補轉四官其餘補轉有差其淮西
招撫司應援立功將士併與比類推賞 己未嗣榮王
與芮奏男孟啟尚幼乞就臣家訓習詔令權就王邸教
導所有資善堂禮例並依舊典 乙亥陳垓言民命與

國脉相維獄訟不當刑罰不中則無以保斯民之命脉
尚何以保吾國之命脉因極言檢覆決獄踈決推勘拘
鎖刺環奏裁詳覆重勘追證十弊從之 四月戊寅朔

臣寮言兩界會子既永行用宜立殿最之法以為稱提
之助從之 己未詔宜州觀察使孟啟用四月十五日

就資善堂講 癸未詔督視趙葵累奏結局朕閱勞念

功深有勒歸之意但北兵雖退邊備當嚴更宜勉留以

副隆委 戊子詔以今年九月有事於明堂 辛卯權

禮部侍郎兼國子祭酒徐鹿卿言生員李寧先飲酒爭
競見害市人辱文教玷士類由臣誨飭無狀乞行罷斥
詔覽卿所陳痛自引咎此固師儒之責但學校規矩玩
弛今當申嚴宜自安職 壬辰詔今歲明堂惟事神儀
物諸軍賞給悉循舊制其乘輿服御中外用度並從省
約令有司條具以聞 甲午以太常寺奏請景靈宮行
事日乞更定後殿饗禮拜跪之數詔朕祇承宗廟何敢
憚勞可一依舊式 乙未朝獻景靈宮 丙申亦如之

已亥詔三省樞密院六部寺監各遵守自來條法不得引援弊例違當重罰 庚子詔臨安守臣趙與憲充明堂大禮提點事務 五月庚戌以闕雨詔錄行在繫囚 壬戌諸王宮大小學教授李桂高進對言淮蜀之險上曰及此閒暇之時當作規模備禦 督視樞密使趙葵奏乞結局詔候來春入奏 癸亥詔趙葵視師於外今已暮年忠力具宣威聲綽著既成卻敵之效復宏預備之規肯為朕留尤見體國可無恩典少示褒崇特

進三秩依前樞密院事兼知政事督視江淮京湖
軍馬兼知建康府江東安撫使行宮留守仍加恩 御
書學牌接近廛市非所以肅觀瞻示崇教可移揭中門
其外門及裏偏門出入之制倣秘書省施行 乙丑詔
陳韓出鎮南服備殫忠勤軍民安平蠻獫綏輯特進一
秩依前知樞密院事湖南安撫大使兼知潭州節制廣
西余玠除兵部尚書依舊四川安撫制置使兼知重慶
府仍兼四川總領夔路轉運使賈似道除刑部尚書依

舊京湖安撫制置使兼知江陵府兼夔路策應使仍兼
湖廣總領丘岳除兵部侍郎依舊淮東安撫制置使兼
知揚州兼淮西制置使呂文德除侍衛馬軍都指揮使
依前保康軍承宣使右領衛上將軍樞密院副都承旨
兼知濠州 辛未詔西湖北山護國寺後龍洞泉源澄
深靈異感格可賜護國龍祠為額永充祈禱 八月丁
亥詔督府官屬各特進一秩令具名銜聞奏 詔知建
昌軍南豐縣黃端亮奪官一等放罷以其增收苗賜科

罰多私也 辛亥以王伯大為參知政事應繇同知樞
密院事給事中謝方叔為端明殿學士簽書樞密院事
吏部尚書史宅之為端明殿學士同簽書樞密院事趙
與憲資政殿學士與執政恩例提領戶部財用仍知臨
安府 詔頒將士邢德等補轉犒給有差以淮西制臣
言其克復正陽兩圍攻劫蘄濠二縣及解圍壽春之功
也 丙寅詔監都進奏院王疇削官二等以臺臣言其
為田事所官操縱作威交通為市誤國害民故有是命

丁卯太常議故端明殿學士洪咨夔謚曰忠文 癸酉詔王伯大除職予郡以監察御史陳垓論之也 八

月甲申以鄭清之為明堂大禮使別之傑為禮儀使應繇儀仗使謝方叔鹵簿使史宅之橋道頓遞使 丙戌觀文殿學士光祿大夫范鍾乞免祠祿詔不許 丁亥

督視趙葵辭轉三官凡六上奏詔卿出提督鉞久懋忠勞方倚成治外之功遂寵錫師中之命制麻播告陳誼固辭褒賞大臣事關羣聽其祇朕命式佇端歸 戊子

以雷州所屯經略司水軍頗橫詔守臣節制 乙未詔
王疇更削官一等正其括田擾民之罪 丙申詔大理
寺丞林炎對疏狂妄動搖國本奪官三等押出國門

庚子上諭輔臣曰所在監司帥守輕行括籍多因細事
中以深文甚而置之死地往往利其財耳真所謂殺越
人于貨至於用刑自有成法今有司率意任情更不遵
守條令凡此皆當禁止可因明裡肆赦益加申嚴如有
非辜越訴究證得實必論如律 壬寅侍御史周坦言

明堂肆赦州郡奉行不虔有稽違隱匿文具三弊乞行革去以廣溥博之仁從之 甲辰詔令戶部嚴革諸路州縣增收多量苗米之弊 九月己未朝獻景靈宮 庚申朝享大廟 辛酉大饗於明堂赦天下是夕雷

辛未以秋霖命從臣日一人禱於天竺山卿監郎官於霍山 十月甲戌朔參知政事別之傑三奏乞歸田里詔除資政殿大學士知紹興府 乙亥以應餘謝方叔並權參知政事 十一月丙午太傅右丞相兼樞密使

鄭清之乞歸田里詔不許 丁未沂靖惠王府乞改授
尚書從之 壬子莊文太子府乞改講周易從之 甲

寅監察御史陳垓言祀者國之大事三歲明禋胙蠻多
非本物皆是自科市戶仰尹臣監督各備正色毋以他
物充代仍令奉常一體精虔庶幾神祇祖考昭格從之
十二月辛巳詔以隆冬嚴寒軍人不易出封樁庫十
八界官楮二十萬令三衙賑之

己酉淳祐九年正月乙巳制以皇姪宜州觀察使孟啟

可特授慶遠軍節度使進封益國公 庚申詔周世宗

八世孫柴彥頴特補承務郎襲封崇義公 詔兩淮京

湖沿江制帥司行下所隸勸諭軍民從便耕種秋成日

官司不得分收 癸亥知臨安府趙與權奏乞給沒官

田五百畝有奇付本府創慈幼局以養遺弃嬰兒置施

藥局以療閭閻疾病從之 丁卯許應龍薨 己巳范

鍾堯並輟視朝一日 辛未詔給臨安府官田三百畝

付表忠觀以旌錢氏之功德 二月癸卯朔詔禮部貢

舉丁亥詔刑部及諸路監司刑獄案卷速與理決仍
差屬官往州縣獄審斷毋令姦胥作弊濫及非辜庚
子鄭清之再乞歸田里詔不許辛丑監察御史朱景
彝奏刑獄民命所繫乞諭所司刷諸處已奏文案立為
限日處分行之從之閏二月癸卯朔詔安南國王陳
日照特賜効忠順化保節守義懷德歸仁功臣依前靜
海軍節度觀察處置等使特進檢校太尉兼御史大夫
上柱國安南國王仍加恩甲辰以鄭清之為太師左

丞相兼樞密使進封魏國公趙葵為右丞相兼樞密使
應繇謝方叔兼參知政事陳韓觀文殿學士福建安撫
大使知福州吳淵端明殿學士沿江制置使江東安撫
使兼知建康府行宮留守趙希堅端明殿學士知建寧
府 乙卯鄭清之辭免太師奏凡五上詔朕延登上相
顯拜維垣所以重巖石之瞻尊道揆之體周公為師而
居左圖任方隆考父聞命而循墻陳情彌確成爾一謙
之美姑惟舊品之仍益賴熙良深可嘉尚 三月癸酉

朔以衢信州旱詔給豐儲倉米五千石賑之 癸未以

賈似道為寶文閣學士京湖安撫制置大使知江陵府

丁亥詔正陽之月日有食之史官先期以告朕祇畏

天戒不遑寧處可自二十一日為始避殿減膳徹樂益

加內省凡爾在列各務交修以輔不逮 癸巳詔決中

外繫囚杖以下釋之 己亥詔增通泰揚真和州安慶

府解額 四月壬寅朔日有食之 丙午詔丘岳閫職

修舉除寶章閣直學士依舊淮東安撫制置使兼知揚

州淮西制置使 辛亥以福州應天啓運宮寅奉祖宗
神御事體至重可領西外宗司兼領免差內侍永為定
式 己未羣臣三上表請御正殿復常膳從之 己巳
鄭清之屢疏乞骸因奏時事十難曰重相權曰凝國是
曰用人才曰足兵食曰守法度曰革弊蠹曰布公道曰
去貪賊曰理財用曰節冗費詔獎留之 五月甲戌浙
西帥臣趙與憲言本司措置鹽課乞自淳祐九年為始
歲舉職司常員及職令狀各一以勵官屬從之 己丑

右丞相趙葵奏乞收回成渙退伏田里詔朕以卿宣力之勤延登右揆告廷已久避寵益堅比遣內侍往諭至意申命漕臣式遄其歸胡為來章又以疾諗夫知不俟駕之義是即教事君之禮豈不忠孝兼盡家國俱榮哉其亟造朝副朕欽佇 甲午鄭案薨 丁酉雨雹 六

月丙寅都省言沿邊將士有歿於王事者雖已褒贈官其子孫猶當旌表以顯忠節詔令邊郡各立一廟以褒忠為額凡前後歿於王事忠節顯著之人並祠焉郡官

春秋致祀 七月庚午朔臣僚言吉州守臣李義山嗜

賄亡恥詔奪官二等令江西漕司追索銀會解安邊所

八月庚子朔同知樞密院事史宅之辭免兼提舉財

用詔不許仍趣條具以聞 丁未詔步軍司支遣匱乏

每年可於豐儲倉給米三千石封樁庫給官會二萬貫

助其贍軍 辛亥詔趙葵除拜已久告假將滿今聞欲

還長沙可令沿江制臣疾速差官邀止不許般挈為歸

計仍令吳淵宣諭赴闕 乙卯廣東提舉司言知潮州

海陽縣陳純仁築堤護田甚廣詔進官一等 丙辰趙

與憲辭免措置戶部財用詔不許 戊午詔今春北師犯

邊呂文德指授將士累策奇功進官二等 庚申知安

豐軍邢德知壽春府劉雄飛有謝步之捷詔各進官一

等 九月丙子提領戶部財用趙與憲創置新倉三百

七十餘間貯米一百二十萬石欲以淳祐為名及照豐

儲倉例辟官四員從之 乙未婉容閻氏進封貴妃

丙申太常少卿暫權給事中盧壯父繳回內降所除吳

沂直祕閣王國壽軍器所幹官錄黃從之 戊午以知

澧州李寬民力行惠政一意裕民特進一秩 庚申參

知政事應僉屢疏乞歸山林以便養病詔不許尋除資

政殿學士知平江府 詔令臨安府諸路提刑司嚴軍

民銷鑿見錢私鑄銅器之禁仍下殿步司一體施行

癸亥賜宰臣執政講讀修注官宴于秘書省 甲子四

川制臣余玠請交引以十年為界詔從之 丙寅肇慶

府高要縣令李元潢貪酷顯著詔削官三等勒停 壬

午詔隆冬嚴寒軍人不易出封樁庫錢十八界會子二十萬貫賑之 癸未詔決中外繫囚杖以下釋之 甲

申蠲大理寺三衙臨安府屬縣見監賊賞錢 丁亥浙

西帥臣言金山水軍統制陳霆貪酷激變詔追毀出身

文字拘鎖沿江制司籍其家 戊子婺州權守臣鄭士

懿言承務郎趙希禱及其子與恣與慙同惡相濟窩藏

盜賊騙奪民財挾弟希禪目睛碎叔祖彥琔寶貝棄叔

祖母骨殖搥叔枚夫手指威使惡黨殞姪崇縵之命絕

滅綱常傷殘骨肉詔希禘追毀出身文字押送西外宗
司拘鎖與恣與慙分移千里外州軍居住 丙申詔令
都省風厲中外應令後士庶上書其言真有益於國者
必加精採倘涉私邪朋奸罔上妄肆雌黃當嚴加究問
以諫臣言譁徒吻士結黨叩關簷鼓是非為攫利之計
故也 十二月乙巳詔吳潛除同知樞密院事兼參知
政事禮部尚書徐清叟為端明殿學士簽書樞密院事
己酉詔皇后親兄謝奕昌特除開府儀同三司依前

保寧軍節度充萬壽觀使奉朝請 壬子史宅之薨輟

視朝一日 詔朕深念厥紹建資善堂令孟啟就學朕

志已定以其年幼未遠姆傅尚留王邸今先欲賜名可
討論紹興二年典例聞奏

庚戌淳祐十年正月辛未天基節羣臣上壽詔刑部及大
理寺奏報罪案各守條限申嚴諸路憲司凡獄訟毋得
淹留致連年拘繫違令臺諫覺察以聞 乙亥詔淮東

制臣丘岳自能撙節軍用乞將朝廷例合支一千萬貫

免科委見體國特進一秩 辛卯以朝議大夫試給事中兼侍講董槐知貢舉權禮部侍郎兼侍讀張礪殿中侍御史葉大有同知兼監試 二月丁酉朔雪御筆賜董槐以下曰卿等老於文學秉司衡鑑以賦而得仲淹以論而拔蘇軾顧不偉歟責舉成法最為嚴重宜加申敝以取實才 詔榮文恭王府講通鑑綱目莊文府講朱熹論語集解 甲辰上諭輔臣鄭清之曰丘迪嘉今早登對朕以廣寇詢之其言皆有始末峒寇既平當加

優擢向來寇作之初或者張皇以甚其事及其平定又
言多殺以妬其功若以浮議而抑之他日何以使人宜
以正卿處之清之奏謹遵聖諭 乙巳都省言銅錢泄
漏偽會充斥奸民無所懲畏詔令沿海州縣山隩海島
結為保甲互相糾察如有犯者及停藏家許告推賞不
告連坐 乙卯雨土 癸未趙葵乞收還成渙徑畀祠
官 詔趙葵懇辭相位始終弗渝使命趨召亦既屢矣
奏陳確苦殆渝一暮朕眷倚雖切而不能強其從也姑

界內祠以便咨訪除觀文殿大學士醴泉觀使兼侍讀
仍奉朝請令學士院擇日降制 戊子趙葵罷右丞相
兼樞密使特授觀文殿大學士醴泉觀使兼侍讀奉朝
請 庚寅以賈似道為端明殿學士兩淮制置大使淮
東安撫使知重慶府李曾伯為徽猷閣學士京湖安撫制
置使知江陵府 四月辛丑右司諫陳垓言改官班引
之人先令赴都堂或御史臺各試書判合理法者許集
注如不通且令為丞再試中方與入從之 癸卯朝獻

景靈宮次幸龍翔宮

五月丙寅朔以皇叔祖福州觀

察使提舉祐神觀善珎為保康軍節度使提舉萬壽觀

襲封嗣濮王

詔吳淵久歷從班屢更事任茲領江間

備竭忠勤山寨耕屯俱就規畫除資政殿學士依舊職

任與執政恩數

六月丁酉龍翔宮奉安感生帝及從

祀聖像仍備祭器比附太一宮禮例祈祝上命輔臣

申嚴百司用例廢法

丁未詔冒濫權攝之人日下住

罷丙辰知藤州楊瑾奪官三等以經略司劾其在任

推剝貪刻虧公營私故有是命

七月癸酉左司諫陳

垓言祖宗治賊吏之法具載國史今州縣官吏賊敗或至營求脫免是致廢法乞下諸路制總監司遵守仍許臺臣覺察從之

丙子上諭輔臣曰在法詞訴須經次

第官司其臺部受詞所當參酌兩造豈宜遽憑單詞剖決致使所屬觀望曲直倒置可令御史臺戶刑部遵守

庚辰詔殿試改用八月十五日

戊子詔兩淮極邊

作邑人照川廣例令監司引試書判

八月甲午朔詔

令戶部嚴革諸路州縣增収多量苗米之弊 戊申御

集英殿策進士 己酉御射殿閱武舉進士射 甲寅

上諭輔臣曰和糴本非朝廷之得已若官司奉行無擾
則人戶自樂與官為市訪聞近年所在和糴未得朝廷
排類預行多敷富室大家臨期率以賂免而中產下戶
反被均敷之害以至散錢則吏胥減剋納米則斛面取
贏專計誅求費用尤夥是致民間所得糴本每石幾耗
其半其何以堪可申嚴約束 九月己巳御集英殿賜

正奏名進士方夢魁等及第出身同出身凡五百一十三人 辛未賜特奏名進士勅凡六百一十五人 甲戌詔進士第一名方夢魁改賜名逢辰 戊寅詔去歲嚴州水患田租其悉蠲之 十月丁酉詔訪聞郡邑間有水患細民流移恐致失所可令逐處出義倉米量輕重多寡賑之務在實惠均及 癸巳御集英殿閱進士射 丙午詔賈似道乘邊給餉服勤八稔凡備禦修築之費自為調度尚有餘蓄殊可嘉獎可進官一等 詔

國家以儒立國士習媿惡世道所關端平初增諸郡解額寢漕闡牒試正欲四方之士安鄉井修孝悌以厚風俗比歲殊失初意可令逐州於每舉待補人數內分額之半先就郡庠校以課試取分數及格者同待補生給據赴上庠補試其天府一體施行 辛酉詔戒兩淮都統司主兵官今後行罰不許輕用脊棍以傷人命 壬申詔新除右丞相趙葵謙退靜恬久辭相位至內祠經幄懇避如初勉諭不回迄虛倚注之意朕甚念之特畀

鄉郡以示光寵以旌眷意可授特進觀文殿大學士判
潭州湖南安撫大使 詔給度牒千道下臨安府易民
間兩界破會 癸酉詔淮西疆場延袤八百餘里近今
沿江制司團結耕屯漸已就緒但制閫置司江南相去
差遠可令淮西提舉李士達就司空山創司提舉本路
山寨 甲戌太傅左丞相鄭清之再乞歸閒詔卿以舊
學元勲再登輔弼精神密契魚水相須當與宗社同休
詎可輕為去就及將閒暇正藉經綸更宜堅定宏規力

持公是體承春意勉為朕留庶幾黃髮之詢是亦蒼生
之福所祈閒退毋復重陳 辛巳日南至 詔余玠任
四蜀安危之寄著八年經理之功敵不近邊歲則大稔
既寢還於舊觀將益懋於遠圖疇其忠勤足以褒勉可
進官二等 壬午雷 癸未詔避殿減膳以示恐懼修
省之意令諸路漕臣守臣體訪民間疾苦當議優恤

丁亥詔曰朕以涼菲受天明命夙夜祇敬不敢荒寧迺
長至後一夕雷聲非時震於朕衷罔知攸措夫乖氣致

異變繇證起皆朕不德朕方避正殿減常膳以恐懼修
省惟爾公卿大夫羣牧百執事各殫乃心揚乃職裨朕
不逮昭答譴告用永孚於休布告中外明知朕意 參
知政事謝方叔吳潛僉書樞密院事徐清叟並乞解機
政詔不許 十二月壬辰朔太傅左丞相鄭清之乞去
詔不許 丁巳虹 監察御史程元鳳言臺諫所以植
立紀綱不可使臺諫之體輕從之 詔監司郡守被劾斥
者令以次官隨即拘權財物量給送還之費庶絕吏席

卷亦愛惜民力之一助從臺臣程元鳳請也

辛亥淳祐十一年正月丁卯制以皇姪慶遠軍節度使
益國公孟啟可改賜名收進封建安郡王依前慶遠軍
節度使 丁亥詔江浙沿流郡縣刷具流民口數於朝
廷樁管錢米內賑濟仍許於寺觀及空閒官舍居止

己丑監察御史程元鳳奏陛下以神聖之資接帝王之
統思祖宗付託之重為社稷久長之圖元正謹始宸筆
渙頒懋嘉宗英之賢誕舉錫名之典爰即公社用進王

封於以隆萬世之基於以係四海之望溥天率土雷動
驪聲甚盛舉也然資善有堂講讀有官所願博選端方
純謹之士增置輔導贊翊之員下至給使服役之人皆
有重厚篤實之行使之出入起居無有不正動靜語默
無有不善此實千萬世無疆之休從之 詔經筵進講

周易終篇講讀記注官各進一秩餘補轉賞犒有差

二月壬辰詔故同知樞密院事李真早從諸老歷事三
朝史學優長風節堅正已久謝事猶未易名賜謚文肅

乙未御垂拱殿左丞相鄭清之等上光宗皇帝寧宗
皇帝寶訓今上皇帝玉牒日厯會要 丁酉詔鄭清之
等進秩有差 三月丙寅詔大銓試點檢雷同試卷官
一員 壬申詔諸道制總監司州郡不得以堂除部注
之闕攬越申辟縱元係辟闕若見任有人亦不許預辟
下次仰常切遵守違將求辟人降罷 乙亥雨土 三
月戊寅以謝方叔知樞密院參知政事吳潛參知政事
徐清叟同知樞密院事 戊子臣寮言刑獄追逮鞠訊

慘酷囚禁淹延請戒飭中外用敬五刑及申儆百司度
府監司守倅不許以私怒寄収者不許過三日違者彈
奏從之 四月壬辰詔賜殿前司十七界會子十萬貫
絹千匹步軍司五萬貫絹五百匹令椿留濟給貧乏及
累重官兵 己亥以潭州林符三世孝行一門義居福
州陳氏笄年守志壽逾九表詔並特與旌表門閭 鄭
清之等上勅令所淳祐條法事類四百三十卷 上諭
輔臣曰昨覽京湖報程璉盧氏縣之捷差強人意朕以

寡昧服祖宗之令緒兢業不敢荒寧適值十六七年應
酬不暇臣清之奏自古事業專在立志臣方叔奏今日
實有機會臣潛奏今日事體漢中為四蜀之首襄陽為
京湖之首浮光為兩淮之首此當在陛下運量中臣清
叟奏願陛下益厲自強之志上曰內修之事又當結人
心貪官污吏為民害者不可不嚴加懲戢 壬寅上諭
輔臣曰邊事他無聞否遷避之民已復業否方叔奏近
來三邊幸無他警淮民之遷避者皆已歸耕其貧甚者

聞制司亦少資給之矣 癸卯詔以今年九月有事於
明堂 乙巳上諭輔臣曰積雨於二麥無害否清之奏
目前雖不為過然得晴則佳臣方叔奏二麥似無害蠶
事惡寒恐少減分數上曰淮上諸城惟合肥濠塹差淺
可諭許堪令其開浚 丙午詔資善堂已及滿歲贊讀
袁高直講陳顯伯檢閱劉昕祖曾默提點內侍王椿幹
辦鄧惟聰各進一秩餘減磨勘支牒有差 戊申上諭
輔臣曰近日內引丞相朕因及祖宗家法之懿者數條

如敬天愛民克已節儉不罪言者皆漢唐所不及朕謂
不必遠藉前代只近法祖宗足矣 已酉上諭輔臣曰
祖宗時遇親邸恩禮隆厚如歲時賜予甚優然訓迪範
防之制尤嚴賓接有禁內外有限近聞有勝妾外館者
有干預他事者殊戾家法所當申嚴清之等遵稟而退
詔勅令所進呈淳祐條法事類禮畢鄭清之謝方叔
吳潛各進二秩 庚戌樞密都承旨兼權吏部侍郎陳
昉奏今尚書省樞密院應劄子非降旨者必先繳進俟

降而後施行可謂盡善然樞密院之法與尚書省不同
或邊事正急或盜賊忽熾機變倏聞酬應宜速小有需
俟關係匪輕乞令樞密院自今邊防及盜賊急務且奏
且行勿拘常程從之 五月丁卯詔趙以夫劉克莊同

共任責修纂國史志傳以全大典日下條具以聞 癸
酉以久雨蠲大理寺三衙臨安府屬縣見監贓賞錢

辛巳詔出封樁庫十八界會子十萬貫給諸軍 壬午

詔決中外繫囚杖以下釋之復蠲贓賞錢 六月甲午

詔余玠整頓蜀閫守禦飭備農戰修舉蓄力俟時期於
恢拓茲以便宜自為調度親帥諸將行邊擣壘捷奏之
來深用嘉歎勉規雋功以遂初志圖上全蜀以歸職方
嗣膺殊封式副隆倚立功一行將士速與具奏推賞

乙卯秘書省言乞辟校勘檢閱等官仍行下諸路漕司
於所部州縣應有印本書籍解赴冊府以補四庫之闕
及故家巨族必有遺書山林名儒豈無著述許令投進
照格推賞從之 七月甲戌上諭輔臣曰近聞外間多

扇關節之說關係風俗不小若不禁戢蠱壞世道詔令御史臺覺察仍下帥漕兩司訪緝置立窠局妄營關節之人究治如律 壬午太白晝見經天 癸未上諭輔

臣曰去歲罷京學類申欲令四方之士各歸鄉校以課試理校定稍復鄉舉里選之意近覽土著士人投匭之書謂猶有未還鄉井者科舉在近可令臨安守臣曉諭士子早還本鄉所有土著人自依此制行歲校之法其游士出學年久不能赴鄉舉者與赴浙漕試令行考校

仍取待補以示優恤 丙戌上諭輔臣曰諸州間多水

旱皆由人事未盡如省刑罰薄稅歛蠲逋負禁科抑懲
官吏之奸察民情之枉可令諸路監司下之郡邑有關
涉六事者日下遵行 八月甲午以鄭清之為明堂大
禮使謝方叔禮儀使吳潛儀仗使徐清叟鹵簿使趙與
憲橋道頓遞使 丁酉熒惑入井 甲寅沂靖惠王府

乞改講周禮從之 九月己未詔皇弟少保保康軍節
度使嗣沂王貴議讀周易終篇其教授官官屬可依昨

來皇弟思正體例推恩 甲子景獻太子府乞改講尚

書從之 丙寅詔昭慈永祐永思永阜永崇永茂六陵

并成穆成恭慈懿恭淑四攢宮遇有修奉告遷神御合

行事務令檢察宮陵所關太常寺一面請降香表擇日

依例排辦 己巳朝獻景靈宮 庚午朝饗太廟 辛

未饗於明堂大赦天下 己卯觀文殿大學士宣奉大

夫游侶凡五疏乞歸田里詔不許 庚辰榮王府乞改

講周易從之 鄭清之力辭扶掖凡五奏詔從之 丙

戊詔鄭清之禮展宗裡慶成緝典回一晴於俄頃實資變
理之能相大祀以肅雍尤見感通之妙爰特頒於瑤帶
庸示眷於鈞衡以答忠勤宜膺榮渥所賜玉帶可使服
繫 十月壬子知樞密院事兼參知政事謝方叔累乞
解罷機政詔不許 閏十月丁巳朔侍御史陳垓奏朱
熹近世大儒有功斯道曾任浙東常平使者適值旱歉
講荒政立義倉流風善政逮今未泯帥臣馬天驥固已
規勸書堂今乞廣其未備招延名儒以重教育詔從之

庚申太常議故戶部侍郎劉漢弼謚曰忠 十一月
丙申京湖制臣言調遣都統高達晉德入襄樊措置經
理漢江南北並已肅清積年委棄一旦收復詔立功將
士官兵各進官一等特支官會三百五十萬貫等第充
賞 御筆襄陽要區積年未曾經理每關憂顧李曾伯
受任邊間抗志遠圖俾襄樊二城一日復舊計慮密而
用力多矣且按兵毆敵觀聽無譁繕城峙糧規略素定
必耕屯之並舉與守備以俱全載嘉忠勤宜示褒勸可

除寶謨閣學士京湖制置大使兼職依舊 壬寅詔隆冬

凝寒都民不易出封樁庫十八界官會子二十萬貫賑
之 癸卯蠲大理寺三衙臨安府屬縣見監贓賞錢

丁未決中外繫囚杖以下釋之 乙酉詔江東西湖南

北福建二廣有災傷瘡厲去處雖已賑恤猶慮州縣奉
行不虔可令監司守臣體認德意多方拯救 庚戌鄭

清之薨贈尚書令追封魏國謚曰忠定 甲寅以謝方

叔為左丞相吳潛為右丞相並兼樞密使 乙卯以徐

清叟為參知政事兼同知樞密院事新知福州董槐為
端明殿學士簽書樞密院事 十二月丙辰朔輔臣謝
方叔等謝新命上降御筆曰朕觀比年以來朝綱浸弛
時事日乖所以並命二相夾輔王室正賴開明公道振
起治功肅紀綱以尊朝廷用正人以強國勢通楮幣以
紓邦計卻哨騎以固邊陲清吏道使無貪黷之風淑士
類使無囂浮之習軍馬當足則飭戒閫帥以去虛挂之籍
人心當結則嘉予守令以行寬恤之恩此皆今日切要

之務昨來並命往往各分朋黨互持已見交相擺闔陰
肆傾排是以猜忌成風衆弊膠轕今朕用搢紳之公言
從中外之人望登庸碩輔參運化權繼自今勿牽人情
勿徇私意以玄齡如晦為法以趙鼎張浚為戒務為正
大之規以副倚毗之意上又曰自來並命二相本欲
協濟緣各任已見且因賓客交關遂成黨與不可不戒
卿等宜同心輔政深矯前人之失清叟奏蕭規曹隨房
謀杜斷必如是而後可方叔等奏惟知盡忠竭力上答

聖恩當佩服勉所未至上然之 丙寅詔令吏部四選

以下刷具應干淹滯名件並要了絕違當重懲 詔游

侶依舊觀文殿大學士進官二等致仕 戊辰詔殿步

司軍兵應歿故累重之家特許以子弟填刺 辛未詔

襄蜀兩淮極邊并新復州郡縣及二廣惡弱去處或過

闕官許令斟酌辟上 壬申詔令諸路監司帥守但干

攤賴支蔓冒罪之人並日下釋之 癸酉上諭輔臣曰

邊事未息武備當嚴五兵所先莫如弧矢昔种世衡守

青澗日教習射羌人畏之其法可以推行詔令諸路帥
閫守臣講明區畫詳議激勵使各令自衛鄉井弓箭箭
隻聽從其便 已卯詔兩淮沿江京湖制司於江北地
分及淮西山寨管內應有官屯民田耕種去處並令團
結隊伍隨其聚落就中擇衆所服者充甲長任責結保
有警率其所部務從便宜或有踈虞先懲頭目人有能
勵率強壯精習武藝者先與獎勵將來能出力鏖戰當
以真命旌賞 庚辰游侶薨輟視朝二日

壬子淳祐十二年春正月丙戌朔御大慶殿羣臣朝賀
上出御札戒羣臣曰繼自今毋養蠹毋惠姦毋以姑息
市私恩毋容僥倖廢公法 詔諸路官司違禁罔私害
民事悉罷之 甲午集英殿大宴宰執內幄奏事上曰
救楮事不可緩吳潛可專此責 丙申詔諸路監司帥
守事有關人命連逮者官欠攤涉者偽會枝蔓者詞人
淹繫者咸釋之仍嚴估平民之禁 詔中興以來諸王
公主妃嬪保母皆有攢所禮宜從厚邇來有司漫不介

意其令臨安府如儀修葺以時祭祀有主奉者不在此數
己亥詔兩浙淮東提舉司所部官闕於正官內差
權毋以白身或罷吏 庚子詔二廣福建江西湖南去
歲疫癘州縣人戶有絕世者令監司守臣稽其財產即
其族命繼給之遠官身歿其家不能自歸者官為理遣
勿令財物有所隱失 壬寅吳潛辭專任楮幣之責詔
朕以二三執政皆天下之選心同志合無往年形迹之
嫌故以楮幣一事俾卿專任面諭已詳胡尚謙執宜亟

祇朕命凡茶鹽錢穀與楮相關者悉新是圖以底成績
潛奏請以方叔提其綱清叟槐贊其成而臣服其勞

詔蠲

闕

府五稅務征 戊申上諭輔臣曰淮東邊報

不一可於江上整蹙萬兵以備緩急江面雖已分定三
流更須擇將分兵巡徼 庚戌詔宰執曰近聞北騎之
來往往儲糗糧立寨柵以為因利乘便之計守臣邊將
方欲嬰城退守則有老師費財之患方欲開關接戰又
有兵連禍結之憂今朕欲於兩淮沿江各令立一項遊

擊軍以備不時調遣設若緩急隨宜應接使大軍偏師
擣虛此正李廣縱部曲逐水草號飛將軍之遺意也又
聞邊疆之外皆平原曠野北騎衝突邊臣每有迅雷不
及掩耳之患今朕欲令極邊州郡開浚水道去城百里
之間三里一溝五里一洫使北騎不得長驅而入邊民
亦可為耕鑿之計此正古者立方田開溝洫以限戎馬
之遺意也邊防二事久注朕懷茲與卿等共籌之條上
便宜以寬憂顧 癸丑上諭輔臣方田事且令近城為

之遊擊軍當招水步各半方叔等曰容講究行之 二

月乙卯朔日有食之 詔禮部貢舉 丙辰詔增資善

堂講官一員 丁巳上諭輔臣資善訓導之官正要擇

人方叔對曰進善不特教以章句凡事皆當訓導使知

孝悌知世務上曰習慣如自然 壬戌詔曰朕惟明目

張膽當言即言其責在臺諫斟酌劑量可行即行其權

在人主我朝固有臺諫敢言具申力抗五七疏而不報

者非所以抑臺諫之風采直以其事之關一從甚重也

今乃不然數年以來奏疏方入臺牒繼之惟知風憲之
必行不俟上章之報可嘗有用之於執政大臣者有施
之於端人正士者如此則人主之所欲用者臺諫皆得
去之臺諫所欲去者人主不得而留之不幾於威權浸
移太阿倒持乎自今後臺諫毋循弊規有失國體奏疏
必俟得旨付出方許報行 廢江灣梅里雇逕魏村古
浦五酒庫以都司言帥司為餉軍剋五庫官吏並緣漁
獵故也 己巳詔諸路提刑按部囚徒 丙子置池州

遊擊軍 戊寅上諭輔臣賈似道已有淮甸肅清之報
不知田疇尚可及耕種否方叔奏兵退在芒種前猶可
及事 辛巳監察御史劉元龍言楮幣積輕宜因各路
時直令州縣折納純用楮從之後公私交病明年仍用
錢會中半 五月甲申朔命侍從卿監一人禱雨於天
竺霍山 乙酉上諭輔臣曰禱祈未應恐獄訟淹延有
傷和氣凡可求之人事者須講究施行 丁亥雨上曰
微雨未浹洽清叟奏方此閔雨土木之役宜省上從之

壬辰上諭輔臣轉眼秋風江淮備禦所當早計方叔
等奏當輕重緩急與諸聞議行 甲午以禱雨出封樁
庫十八界楮二十萬給散諸軍有差 乙未上曰夜來
一雨甚好聞外間得雨已多但京城差少今想内外霑
足矣槐奏昨日軫恤軍民恩詔甫頒甘雨隨至以此見
天人相與之際甚近願陛下益堅對越之心上曰益當
自勉 乙巳盜起玉山 庚戌罷諸郡今界從臺臣蕭
泰來奏也初故相清之奏行今界於六郡會玉山饑民

嘯聞言者歸咎焉

六月癸酉朔盜逼衢境命徐敏子體

訪上曰當撫定為主

乙卯詔復諸郡待補生人數舊

額 癸亥出百萬倉米三萬石賑衢信饑

乙丑上諭

輔臣曰玉山寇已平方叔等奏民窮則為盜守臣不可

不擇 戊辰上諭輔臣曰邇年科舉取士鮮得實學士

風人才關係氣數何策以救之潛奏乞於省試額中輟

一二十名令有司公舉海內行義文學之士庶尚存鄉

舉里選微意曩時朱熹真德秀亦有此請 癸酉上曰

近日學校之士本起於至微不謂其相激乃爾若紛紛
不已恐非美證先是三學諸生叩閭言京尹余晦相率
出學上令學官勉

闕

齊故因輔臣奏事復及之 丙

子大理正尹桂輪對乞置

闕

於禁嚴非特父子之情

浹洽亦所以為事制曲防之慮

戊寅詔朕惟故相中

令魏國公忠獻王史彌遠光輔兩朝備殫忠蓋而嘉定

更化之績甲申定策之功尤甚彰明較著者也銘書太

常永有休聞而薨背越二十年隧道之碑未立朕甚憫

焉爰攷太宗神宗皇帝所以光寵普琦故事親御翰墨
為製碑銘以公忠翊運定策元勲題其首可宣付史館
以備立傳以見朕褒嘉念舊之意 己卯上諭輔臣衢
嚴水災江東亦苦雨此陰盛之證方叔等奏水亦兵證
邊備不可不嚴 七月甲申上諭輔臣嚴州水勢可駭
移撥之米當賑濟不當賑糶方叔奏衢婺台亦多漂蕩
宜一體救恤 戊子上諭輔臣曰信州水災尤甚方叔
奏建寧劔括蒼亦然皆臣等輔政無狀上千天和所致

今惟以救恤為急 庚寅以諸路水灾令學士院降詔
遣使分郡賑恤詔曰蓋聞王道得則陰陽和公正修則
百川理朕夙寤晨興無一念不在乎民乃夏涉秋淫雨
為沴水失其性沸湧丘原嚴陵衢婺台處之封上饒富
沙劔邵之境溢於城邑蕩乃屋廬父子室家不能相保
田疇稼穡存者幾希興言內郡之被災未有此時之為
甚由朕不德在爾何辜已命攷司賑恤仍遣朝臣存問
務昭布於寬條以推行於實惠於是遣諸軍計院師興

往建邵南劔國子監簿葉隆禮往嚴衢信登聞檢院胡
大昌往婺處合告勅凡一百道分遣有差 辛丑上問
輔臣三使行未方叔等奏明日出關清叟奏建邵南劔
水尤甚師輿所將僅百萬恐賑恤有限上曰可增五十
萬 乙巳上曰聞福建水傷人頗多清叟奏水退之後
貧民無以為生亦有自經溝瀆者聞帥臣陳昉發楮三
十萬漕臣饒虎臣發楮五十萬米五千石以賑之乞與
除豁使知聖旨上欣然從之其後蠲九郡苗米凡二十

二萬五千八百七十石有奇 已酉上諭輔臣徐霖以
庶官論臺諫京尹要朕之必行殊傷事體適已批出潛
等奏願陛下更賜優容 御批徐霖以庶官而論臺諫
及京兆要朕之必行事關紀綱前此未有昨言去余晦
為是今乃疏癸抗為奸言及朝士親填姓名情懷不一
首鼠兩端可依所乞除職予郡 八月癸丑朔令戶部
下諸路申嚴州郡苛取斛面之禁 乙未詔明年省試
仍用二月一日以四月殿試先是淳祐九年臺臣陳垓

奏省試用三月殿試八月遠方之士留滯逆旅至是復
檣方叔潛乞解機政疏四上詔不許甲子申嚴文
武官改正叙復之令己巳出封樁庫十八界楮四十
萬賧行在軍民丁丑太史奏新厯成詔賜名會天厯
行之戊寅再決中外繫囚上曰淫雨未已恐四方郡
縣刑獄淹延或有慘刑妄殺可詔行寬卹九月壬午
詔以明年改為寶祐元年丁亥詔建西太乙宮於延
祥觀左庚戌上諭輔臣近來早朝多奏臣下辭免等

細事而事體大者反從繳進甚非臨朝聽政之意自今
宜就早朝面奏 十月壬子朔詔諸路守臣依舊制到
任半年條便民五事及四方利病來上 癸丑以徐清
叟除參知政事董槐同知樞密院事 甲寅都省言既
復襄樊宜措置屯田修渠堰詔守臣高達任責仍令前
德安守臣程大元督役 甲子上諭輔臣史院纂修須
用褒貶必得是非之公乃可 壬申詔舉帥材 癸酉
宰執擬進都承旨陳力修恩數上曰集撰為都承方可

依權侍郎法秘撰未可引此恩數 十一月辛巳朔右

司李伯玉劾御史蕭泰來上令伯玉具都司劾御史故事聞奏詔曰國家設御史所以糾正百官置宰掾所以參贊機務御史乃天子耳目之臣而掾不過一大有司未聞有以庶僚而糾劾御史者近者徐霖以都司而按大有今李伯玉又以都司而按泰來陰懷朋比之私蔑視紀綱之地是非所以輕臺諫乃所以輕朝廷也李伯玉乃復援張商英等事以文其過然三省密院奏請專

邪況郭磊卿以正言而按李遇吳當可以體統之聯屬也翁甫以下士而按別之傑以其人事之關係也若都司可以按御史則御史反將聽命於都司矣朝綱不幾於紊亂乎李伯玉可降兩官故罷 庚寅吳潛罷以御

史蕭泰來論其奸詐十罪如王安石而又過之也 丙

申夜臨安火丁酉夜火乃熄 戊戌詔避殿減膳 庚

子行失火家罰成忠郎劉世顯除名編管 壬寅詔曰

朕以菲涼託於兆人之上夙夜祇懼不敢荒寧乃者仲

冬以來祝融挺災仍舊而見闌闌盛繁之地貨財懋遷之區煨燼為墟生聚無所號呼顛踣震於朕聞何辜今之人至此極也可自今月十九日後避正殿減常膳應中外臣寮並許實封直言闕失毋有所隱以稱朕懇惻為民之意 以隆寒出封樞庫十八界會子二十萬賑三衙諸軍其出戍官兵之家倍支 丙午宰執奏曰臣等昨蒙聖賜御製仁厚論深得本朝以仁立國之意上曰太祖得天下市不易肆累聖皆本此意 己酉上諭

輔臣年來文體稍浮科舉在近宜少革之方叔奏欲變
文體當自奏議始上曰經濟錄奏義可為法 十二月
乙卯以吳潛為觀文殿大學士提舉太平興國宮 已
未詔追錄彭大雅創築渝城功復元秩仍官其子 癸
亥都省言本朝自中興以來依海建都其神合該大祀
詔自明年始春秋遣從臣奉命往祠仍令奉常條具典
禮來上 丁丑立春雷

癸丑寶祐元年正月庚辰朔御大慶殿羣臣朝賀上出

御筆曰朕惟皇嗣之建係宗社國家之本固宜早計而
豫定也建安郡王某可為皇子改賜名禕令學士院降
詔 癸未詔曰有天地然後有父子立愛惟親聖王所
以重人道之經正天下國家之本也朕荷上帝之眷祐
續列聖之基圖思所以為詒謀之計夙夜不敢康若稽
前猷祇用率迪建安郡王攷藝祖皇帝之嫡系十一世
孫皇弟嗣榮王與芮之子而朕之猶子也生有奇質岐
嶷夙成朕意屬之久矣頃以尚幼就邸諭教而能篤志

問學聞於道術智誼之指時命入侍莊重有儀益有契於朕心今年齒寢長攷禮正名允合古誼俾居內掖以共子職仍開資善以親師模庶幾日見正事日聞正言以成就其德美焉上以嚴宗廟下以係億兆之心也其以為皇子改賜名禔宰執稱賀上曰朕注意於此久矣方叔對曰此事出於聖斷宗社之福也 甲申天基節羣臣上壽上曰聞元日出命外論甚喜方叔對曰不但人心胥悅轉陰為晴可見天意 御製資善堂記賜皇

子翌日皇子具表謝 甲辰詔以權禮部尚書兼直學士院陸得輿知貢舉中書舍人兼侍講鄭發祕書少監兼侍立修注官崇正殿說書年子才同知侍御史程元鳳監試 二月己酉日有食之 詔知貢舉陸得輿等崇雅黜浮丕變士習 壬子雪詔臣寮久在遷謫者令自便惟誤國殄民者弗赦 戊辰謫陳垓潮州居住先是宰執奏其貪贓不法宜付有司鞠問然重以臺臣下吏且從遷謫上曰當如此以為人臣懷利事君者之戒

己巳再蠲兩浙漕司臨安府竹木稅一月 三月壬

午上諭輔臣夔門擇守切於東南宜速區處 丙申以

前參知政事別之傑薨輟視朝尋贈少師 庚子以韓

宣為遙郡防禦使守夔州兼副帥 壬寅詔曰比年以

來風俗不美好惡不公臣僚論列固許風聞而廉訪不

真是非貿亂自今大臣除授惟才是用內外臺彈劾並

須審實毋據細故潛發陰私其有贓污實迹則祖宗自

有成憲必罰無赦咨爾有位其修身奉法以副朕嘉與

維新之意 四月甲寅申嚴廷試挾書之禁 壬戌錄

西柳關捍禦之功高達程大元李和吉文瑄王登及將士等增秩補官賞賚有差 己巳上問蜀中近報方叔等奏已下夔路清叟奏蜀中向後分置四帥庶有犄角之勢上曰舊自有四戎帥又有正副帥槐奏此亦二矛重弓之意 五月戊寅朔上曰趙希堅可差知平江府其人清修儘能撫摩先是上以吳門擇守諭輔臣方叔奏平江東控海道年來和糴民力頗困宜得才略善撫

摩者至是方叔等咸贊上知人之明 辛巳省罷處州

稅官二員置麗水縣西尉 甲申以工部尚書兼直學

士院兼侍讀尤煇工部侍郎兼侍講林彬之國子司業

兼崇正殿說書葉夢鼎為御試詳定官 乙酉御集英

殿策進士 丙戌御射殿呈武舉七射 戊午新除直

華文閣湖北運判兼知鄂州余晦朝辭上曰西事乏人

卿可為朕一行晦奏臣資淺望輕西事素未諳歷若冒

承當恐致誤國上曰朕與宰執熟籌之無如卿者 庚

申以余晦為司農卿四川宣諭使 壬申詔昨已頒余
晦諭蜀之命道里遙遠邊防宜急毋得退避以失事機
七月辛巳上諭輔臣余晦朝辭已戒其務行寬政是
日國子司業葉夢鼎進對奏至三蜀遣使上曰此人
有才葉夢鼎奏其人雖少有才蜀當垂亡危急之秋恐不
勝任願入聖虞毋嫌反汗 壬午以前參知政事王伯
大薨輟視朝 丙戌以蔡杭施退翁並兼資善堂直講
庚寅溫台處三郡大水詔發豐儲倉米及各州義廩

賑之

甲午以余玠薨輟視朝

庚子以董槐兼參知

政事

癸卯詔撫諭四川官吏軍民

八月癸丑詔福

建帥司毋得循襲以本州寄居充幕屬

丙辰詔朕追

惟大母保祐之恩楊次山等易名之典尚闕其賜次山

謚惠節谷謚敏肅石謚忠憲 乙丑詔鑄寶祐新錢以

皇宋元寶為文

九月戊子詔鄭清之舊學云亡朕切

念之遠日有期可令慶元府里葬從其厚

十月丙午

朔出封樁庫楮四十萬賑行都軍民 十一月乙酉西

太乙宮成

辛酉日南至御大慶殿羣臣朝賀上諭輔

臣襄城一捷甚偉數十年所無令降詔獎諭 壬寅以

延昌公主進封瑞國命徐清叟為冊禮使董槐副使清

叟撰冊文書冊篆印冊以象齒印以金一寸文曰瑞國

公主之印 十二月乙卯御文德殿冊瑞國公主

龜鑑曰其封瑞國也必才明敏慧必仁孝溫恭必能
通孔孟之書必克遵任姒之教必能肅雍而成德必
處富貴而不驕然後可以啟正觀晉陽之寵可以崇
興國鄭國之封其與書之紀娥英之盛詩之歌桃李
之華者同一宮闈之美也又非
得易家人有孚之道發之乎

庚申以前參知政事劉伯正薨輟視朝 壬戌景獻

太子府沂靖惠王府並改授尚書莊文太子府改授周

禮 辛未太常議故直龍圖閣李道傳謚曰文節

宋史全文卷三十四